

**PEMBERITAHUAN PERTANYAAN LISAN
DEWAN RAKYAT MESYUARAT KETIGA,
PENGGAL KEDUA, PARLIMEN KEEMPAT BELAS**

PERTANYAAN : BUKAN LISAN/BERTULIS
**DARIPADA : YB TUAN LARRY SOON @ LARRY
SNG WEI SHIEN [JULAU]**

SOALAN

YB Tuan Larry Soon @ Larry Sng Wei Shien (Julau) minta **MENTERI PEMBANGUNAN USAHAWAN** menyatakan apakah langkah-langkah yang dilaksanakan oleh Kementerian untuk memberdayakan usahawan terutama sekali daripada kalangan B40 dan usahawan luar bandar.

JAWAPAN

Yang di-Pertua,

1. Dasar Keusahawanan Nasional 2030 (DKN 2030) yang telah dilancarkan pada 11 Julai 2019 bermatlamat antara lain untuk memperkasakan golongan berpendapatan rendah terutama B40 dengan menanamkan minat dan budaya keusahawanan bagi menggalakkan pertumbuhan sektor keusahawanan negara. Matlamat ini juga adalah selari dengan aspirasi Wawasan Kemakmuran Bersama Negara 2030 yang mensasarkan sektor keusahawanan sebagai pemacu ekonomi negara melalui peningkatan sumbangan PKS dan usahawan mikro kepada KDNK.
2. Program-program utama yang disediakan oleh MED melalui agensi-agensi berkaitan bagi membudayakan bidang keusahawanan di kalangan golongan B40 dan luar bandar merangkumi pembangunan modal insan dan akses kepada pembiayaan.
3. Di antara program-program pembangunan modal insan yang telah diperkenalkan dan dilaksanakan oleh MED untuk memperkasakan usahawan golongan B40 dan luar bandar seluruh negara adalah seperti berikut:

- a) **Program Pemangkin Usahawan Sosial Hebat (PUSH)** oleh MaGIC merupakan program “*Social Enterprise Development*” (SED) yang memberikan pendedahan kepada usahawan mengenai perniagaan francais dan bertujuan untuk mengembangkan perniagaan. Inisiatif ini dapat meningkatkan kesan sosial positif di dalam mengembangkan perniagaan yang dipacu oleh perusahaan berpertumbuhan tinggi. Sehingga kini, 40 orang usahawan *Social Enterprise* (SE) yang terlibat dalam program ini;
- b) **Projek Rintis Pembangunan Usahawan Tani Fertigasi (PRINT)** merupakan kerjasama MED dan INSKEN yang dilaksanakan di Terengganu sejak Jun 2019. Ianya mensasarkan penglibatan komuniti B40 melalui galakan keusahawanan dalam bidang tanaman fertigasi. Melalui program ini, usahawan baharu dijangka menjana pendapatan bersih sekurang-kurangnya RM3,000 sebulan dan menggiatkan penglibatan mereka dalam bidang pengeluaran tanaman makanan secara komersil. Program ini akan diperkembangkan ke seluruh negara mulai tahun hadapan bermula dengan Negeri Sarawak;
- c) **Program Rangkaian Mikro (*Micro Connector*) oleh SME Corp.** Program ini menawarkan bantuan di peringkat permulaan kepada usahawan mikro untuk memulakan dan menjalankan perniagaan. Sehingga kini, 5 syarikat telah dilantik bagi melatih dan menyediakan perkhidmatan kepada usahawan dari golongan B40 dan seramai 18 orang peserta dari golongan B40 telah menerima manfaat; dan
- d) **Program *Women Netpreneur & Digital Business Workshop* oleh SME Corp.** Program yang bertujuan mendedahkan serta menggalakkan penglibatan usahawan wanita dalam perniagaan atas talian ini telah diadakan di Kuching, Miri, Kota Kinabalu dan Tawau dengan penglibatan seramai 421 peserta.

SOALAN NO : 14

4. Manakala, di antara program pembiayaan yang ditawarkan adalah:

- a) **Program Pembiayaan Premis Usahawan (i-3P) oleh SME Bank**

Pembiayaan yang fleksibel untuk usahawan memiliki atau membiayai semula premis perniagaan seperti rumah kedai, lot kedai, ruang pejabat dan kilang sama ada yang telah selesai atau masih dalam pembinaan. Sehingga 30 September 2019, pembiayaan sebanyak RM62, 564,500.00 telah diluluskan untuk dimanfaatkan oleh 16 orang usahawan yang layak;

- b) **Skim Pembiayaan Ekonomi Desa (SPED) oleh SME Bank**

Memfokuskan kepada pengusaha Bumiputera luar bandar bagi memulakan perniagaan, meningkatkan ekonomi serta meningkatkan perusahaan yang diceburi. Sehingga 30 September 2019, pembiayaan sebanyak RM 2,023,500.00 telah diluluskan untuk dimanfaatkan oleh 16 orang usahawan yang layak;

- c) **Pembiayaan Kontrak dan MySMEBina oleh SME Bank**

Pembiayaan khas untuk membiayai kontrak pembinaan dan infrastruktur serta kontrak mudah yang berjangka pendek bagi melaksanakan serta menyempurnakan projek dalam tempoh kontrak yang telah ditetapkan. Sehingga 30 September 2019, seramai 2 orang usahawan dengan jumlah pembiayaan sebanyak RM477, 400.00 telah diluluskan;

- d) **Program Pembiayaan MySMEBekal oleh SME Bank**

Pembiayaan khas untuk membiayai kontrak pembekalan dan penyelenggaraan secara terus (tanpa proses nilai tambah) yang berjangka pendek tanpa sebarang cagaran;

- e) **Program Pembiayaan Perniagaan Kecil (SBF) oleh SME Bank**

Bertujuan untuk meningkatkan peluang usahawan mikro yang berpotensi besar untuk menceburi bidang perniagaan baru dengan menyediakan kemudahan pembiayaan modal kerja dan modal pusingan. Sehingga 30 September 2019, seramai 7 orang

SOALAN NO : 14

usahawan dengan jumlah pembiayaan sebanyak RM1,586,600.00 telah diluluskan; dan

f) **Skim Pembiayaan *TEMAN TEKUN* oleh TEKUN Nasional**

Program ini menyediakan pembiayaan menggunakan konsep berkumpulan bagi menyediakan kemudahan pembiayaan dengan lebih mudah dengan pembiayaan minima sebanyak RM1,000 hingga maksima RM10,000 bagi pembiayaan pertama serta tempoh pembiayaan 6 bulan hingga 5 tahun.

Sekian, terima kasih.